

*Statuta in admissione Baccalaureorum in artibus legenda, ad quorum
observationem singuli tenentur virtute juramenti.*

- I. **P**rimus annus Rhetoricam docebit, secundus & tertius Dialecticam, quartus adjungat Philosophiam; & artium istarum domi forisque, pro ratione temporis, quisque sit auditor. In hoc quadriennio bis quisque disputato in publicis scholis, bisque respondeto in suo grege: quæ si pertecerit, & post consuetum examen dignus videatur, Baccalaureus esto; ita tamen quod prius respondeat quaestioni, & stet in quadragesima more consueti usque ad postremum actum, & super his cautionem realem exponat.
- II. Præterea unanimi Magistrorum Regentium & Non-regentium consensu statutum est & ordinatum, ne Baccalaureus quispiam publicis supplicationibus seu actibus quibuscunque in caputio suo aut habitu scholastico alio utatur quam furruris solum buggeis aut agninis.
- III. Singulos insuper qui hunc gradum aliquem subituri sunt astrictos & devinctos esse volumus, ut statuta, ac istius Universitatis probatas consuetudines pro viribus observent, utque ejusdem Universitatis pacem nullius rei prætextu perturbent, quin eos qui sic pacem perturbare noverint ad Cancellarium seu ejus vices gerentem quamprimum deferent; quod denique honorem hujus Universitatis nostræ pro virili augeant ornentque.
- IV. Statuimus etiam quod unusquisque ad respondendum quaestioni post ultimum actum & ante decimum quartum *Januarii* admissus, virtute juramenti Academiae præstiti obstringatur se neque hic neque Oxonii cum gradum Magisterii ambiat terminorum computum facturum ab admissione, sed a finali determinatione in quadragesima admissionem suam subsequenti.
- V. Denique statuimus & ordinamus quod quilibet Graduatús dum moram traxerit in nostro municipio, habitum habeat de proprio, gradui suo competentem, quo publicis supplicationibus, sermonibus ad Clerum, Vespertiis quoque, atque inceptions illius facultatis cuius est scholaris interesse strictius obligetur.
- VI. Postremo statutis nostris cautum est, ne quis hic ad gradum aliquem admittatur, nisi se obedientem fore Cancellario aut ejus vices gerenti juraverit, seque simpliciter atque ante omnia sua privilegia renunciaturum in quantum privilegiis & statutis Universitatis contrariantur: salva tamen semper compositione inter Universitatem & Collegium Regale facta. Jurabis quod hæc omnia observasti & observabis, nisi aliter per gratiam per Academiam concessam dispensatum tecum fuerit, sicut te Deus adjuvet, & sancta Dei evangelia. Jurabis etiam quod in conscientia tua agnoscis Regem esse, & juxta verbum Dei esse debere supremum gubernatorem Ecclesiarum magnæ Britanniae, & Hyberniae, in omnibus causis tam Ecclesiasticis, quam Civilibus: nec ullum alium externum Principem, Pontificem, aut Prælatum, ullam habere, vel habere debere auctoritatem infra hoc regnum magnæ Britanniae, & Hyberniae, sicut te Deus adjuvet, & sancta Dei evangelia.